

BERTSO BERRIAK

Miren Amuriza

Irabazleak eta galtzaileak



I

Politikari erretxinduek
bakeagatik bederen,
aro berrian ere ez ote
dute hartuko atsedena?
Hor ari dira sailkatu nahian
alderdi bakoitza zer den,
baina “irabazle” eta “galtzaile”
izendatu baino lehen,
argi dezagun zer irabazi
eta zer gal daitekeen.

II

Ondo jokatu ezkerre gauza
asko irabazten dira:
izan daiteke lagun berri bat,
partxis edo mus partida,
izan daiteke apustu on bat,
karrera bat, futbol liga...
Nahiz ta jokotik jokora asko
aldatzen den perspektiba,
irabazteko itxaropena
jada garaipean erdi da.

III

Zer da ordea gal daitekena?
horra galdera gordina
PNV-k galtzear dauka
Bere jaungo hautsezina.
PSOE-ri ere pasatu zaio
bototan gauza berdina.
Edonorentzat izan liteke
galtzea gauza samina
txarrena ez balitz galdutakoa
berreskuratu ezina.

IV

Bukatu ez den gatazka bati
ekiten ari garenez,
gudu-zelaia ezin da bete
“galtzaile” ta “irabazlez”.
Etorkizuna jokoan dela
asmatzea ez da errez,
baina bide bat zabalik dago
ez itxi inork mesedez!
Horretan inork ez du galduko
nahiz denek irabazi ez.

V

Historikoki mugarri bat den
momentuan gaudelarik
guk ez genuke irabazi nahi
harro sentitzeagatik,
baina ez dugu galtzaile izan nahi
zigorrik merezi barik,
berdinketarik ere ez dugu
desio joko hortarik,
baizik guztiok abiatzea
baldintza berdinetatik.

VI

Aurrean dugun paradoxari
nahi nioke errepara:
“derrotatuok” itxaropentsu
ta pozik gatoz plazara,
“Irabazleak” aldiz dutena
amorruta eta ikara.
Izenak bazter utzita denok
irabazle izango gara
elkarbizitza antolatzeke
giro on bat lantzen bada.



DOINUA: “Azken arnasa emango nuke”



Bidali zure sortak bertsoak@argia.com helbidera. Aukeratuak orri honetan argitaratuko ditugu.